

Inatsisissatut siunnersuummut nassuiaatit

Nassuiaatit nalinginnaasut1. Inatsisissatut siunnersuutip tunuliaqutaa

2011-mut aningaasanut inatsimmi isertitassanik peqqumaatinik pilersitsiniarnermut aammalu Naalakkersuisut ilaatigut meeqqanut inuusuttunullu tunngasutigut annertunerusumik iliuuseqarnissamik salliutitsinerannut atatillugu qamutit motoorillit akileraarutaat pillugit Inatsisartut inatsisaat allanngortineqassasoq siunnersuutigineqarpoq. Allanngortitsineq Nunatta Karsianut isertitaqarnerulernermik pilersitsissaaq, aammalu avatangiisinut iluaqutaasumik sunniuteqassalluni.

2. Inatsisissatut siunnersuutip imarisaa

Inatsisissatut siunnersuutip nassatarissavaa, qamutitut motoorilinnut oqimaassusii naapertorlugit akitsuutip 10-50%-imik qaffanneqarnerat ukiumi akileraaruteqarfiusumi 2011-mi atuutitertumik.

Qamutitut motoorilinnut oqinnerpaanut (900 kg. angullugit oqimaassusilinnut) akileraarut 10%-imik 6.554 koruuninut qaffanneqassaaq. Akulliusumik oqimaassusilinnut (901 kg.-niit 1.500 kg.-mut) akileraarut 20%-imik qaffanneqassaaq 10.049 koruuninut.

Aammattaarlu oqimaassutsimut immikkoortitsineq nutaaq eqqunneqassaaq (1.501 kg.-niit 1.800 kg.-mut), taakkunanilu akileraarut 30 procentimik qaffanneqassalluni 14.235 koruuninut. Oqimaassutsinut nutaamik immikkoortuliineq ukiuni kingulliunerusuni qamutit motoorillit oqimaannerusut tamatumanili amerlanertigut aamma mingutsitsinerusunik eqqussisalersimanermut atatillugu isigineqassaaq.

Tamanna aamma tunngavigalugu oqimaannerpaatut (1.800 kg. sinnerlugit) oqimaassuseqartunut akileraarut 50%-imik qaffanneqassaaq 16.425 koruuninut.

Siunnersuutigineqarpoq motocykelinut akileraarut 10 %-imik qaffanneqassasoq 3.540 koruuninut.

3. Aningaasatigut allaffissornikkullu pisortanut sunniutissai

Qamutitut motoorilinnut akileraarutit qaffannissaannik siunnersuut Nunatta Karsianut 2011-mi ukiunilu missingersuusiorfiusuni ukiumut 17 mio. koruunit missigisaannik isertitsisarnissaa ilimagineqarpoq.

Siusinnerusukkut akitsuutinik/akileraarutinik qaffaasarsimanerit eqqarsaatigalugit qamutitut motoorilinnut akileraarummik qaffaaneq biilit ikileriangaaarsiarnernannik kiisalu nunat allaniit biililik eqqussuinerup killilerneqarnerannik kinguneqarnissaa ilimagineqarpoq. Taamatut allannguuteqarnissami isertitatigut ataatsimut sunniutissat eqqoriarneqarsinnaasimangillat.

Siunnersuut allaffissornikkut annertunerusumik sunniuteqarnissaa ilimagineqanngilaq.

4. Aningaasatigut allaffissornikkullu inuussutissarsiutinik ingerlatsisunut sunniutissai

Siunnersuut inuussutissarsiutinik ingerlatsisunut qamutunut motorilinnut ukiup affakkaartumik akileraarutip qaffannerannut atatillugu aningaasartuutaanerulissaaq. Inuussutissarsiutinik ingerlatsisut akileraarummik ingerlatsinermi aningaasartuutitut akileraartarnermi ilanngaatinginnissinnaammata akileraarutip qaffannera tamatumunnga atatillugu tamakkiisumik sunniuteqartussaangilaq.

Siunnersuut inuussutissarsiutinik ingerlatsisunut allaffissornikkut sunniuteqarnissaa ilimagineqanngilaq.

5. Avatangiisinut pinngortitamullu sunniutissai

Siunnersuutip avatangiisinut pinngortitamullu ajunngitsumik sunniuteqarnissaa ilimagineqarpoq.

Akileraarutip qaffannera ilaatigut biilit pigineqartut ataatsimut isigalugit ikileriarnissaannik, ilaatigullu biilit angisuut annertuumillu mingutsitsisuusunit mikinerusunut avatangiisinullu ajunnginnerusunut taarsersorneqalernissaannik kinguneqarnissaa ilimagineqarpoq. Tamanna Naalackersuisut politikkerisaannut naapertuuppoq CO2-millu assigisaanillu aniatitsinermik annikillisisissalluni.

Siunnersuutip aamma qamutunik motorillinnik innaallagissamik brintimilluunniit taamaallaat ingerlatseqartunik atuinissaq pilerinarnerulersippaa, takuuk inuit biili biilillu assartuutit innaallagissamik brintimillu ingerlatillit eqqunneqarneranni, qamutit motorillit akileraarutaanillu akiliinngikkallarnissamik Inatsisartut inatsisaat nr. 1, 17. maj 2010-meersoq.

6. Aningaasatigut allaffissornikkullu innuttaasunut sunniutissai

Siunnersuutip innuttaasut aningaasanik atugassaqarnerat, qamutip motorillip qanoq ittuunera apeqputaatillugu, annikitsumik annikillilivigissagaa ilimagineqarpoq.

Siunnersuut allaffissornikkut innuttaasunut sunniuteqassanngilaq.

7. Naalagaaffeqatigiinnermut Namminersorlutillu Oqartussanut tunngasut

Inatsisissatut siunnersuut naalagaaffeqatigiinnermut attuumassuteqanngilaq.

8. Oqartussaasunit soqutigisaqatigiinnillu tusarniaaneq

KANUKOKA, Kalaallit Nunaanni Sulisitsisut Peqatigiiffiat, Nunaqavissut Suliffiutillit Kattuffiat (NUSUKA), Sulinermit Inuussutissarsiuteqartut Kattuffiat (SIK), Inuussutissarsiordermut Suliffeqarnermullu Naalackersuisoqarfik, Aalisarnermut, Piniarnermut Nunalerinermullu Naalackersuisoqarfik, Ineqarnermut Attaveqarnermullu Naalackersuisoqarfik, Nunamut namminermit, Pinngortitamut Avatangiisinullu Naalackersuisoqarfik aamma Aatsitassarsiordermut Pisortaqarfik.

Tusarniaanermut akissuteqaatit ukunannga tiguneqarsimapput Kalaallit Nunaanni Sulisitsisut Peqatigiiffiat (GA),KANUKOKA, Kommuneqarfik Sermersooq, Nunamut namminermit,

Pinngortitamut Avatangiisinullu Naalackersuisoqarfik aammalu Aatsitassarsiornermut Pisortaqarfik.

KANUKOKA kaffaanermit ataatsimoortumik tapiissutitigut taarsiissuteqarnissamik piumasqaateqarpoq.

KANUKOKA-mit oqaatigineqartutut apeqqu tamanna ataatsimoortumik napiisutit pillugit isumaqatigiinniarnernerup iluaniippoq. Kommuneqarfik Sermersuup tusarniaanermi piffissaliunneqartoq ajuusaarutigalugu oqaatigaa. Kommunnip ataatsimut isigalugu mingutsitsinerup millisaatigisinnaasaanik inatsiseqartitsinikkut iliuusaasut iluarisimaarpai. Tamatumani matumani inatsimmut siunnersuut aamma pineqarluni. Siunissaq ungasinnerusoq eqqarsaatigalugu biilit ikileriarnernannik kinguneqarsinnaanera kommunip isumaqataaffigaa, kisiannili ukiorpassuit suli ingerlaqqaartariaqassagunarlutik. Inatsit kommuninut aningaasaqarnerup tungaatigut sunniuteqartussaassaaq.

Naalackersuisut siunnersuutitik politikikkut suliaqarnerat pissutigalugu ajoraluartumik tamakkua siusinnerusukku tusaarniaassutigineqarsinnaasimangillat.

Qamutitut motorilinnut akileraarutip allanngornerra C=2-mik aniatsitsinermit sunniuteqassasoq GA-p isumaqataaffigaa isumaqarlunilu allannguneq akinut akillu qanoq qaffasissuseqarnerannut tuniluulluni sunniuteqarumaartoq.

Nunamut Namminermit, Pinngortitamut Avatangiisinullu Naalackersuisoqarfiup qamutitut motorilinnut akileraarutip qaffanneqarnissaa tikilluaqquaa. Naalackersuisoqarfiup akileraarutitigut isertitat avatangiisinut iliuutsinut atorneqarnissaat takorusukkaluarpa.

Siunnersuutigineqartutut aningaasat sumut atorneqarnissaannik aalajangiinissap politikikkut naleqquttunik tulleriiaarisinnaaneq killiliiffigissavaa taamaasillunilu Naqalackersuisut akileraartarneq akitsuusiisarnelut eqqarsaatigalugit politikkiannut akerliussalluni.

Aatsitassarsiornermit Pisortaqarfik oqaaseqaatissaqannginnerarsimavoq

Aalajangersakkanut ataasiakkaanut nassuiaatit

§ 1-imut

Nr. 1-imut

Siunnersuutigineqarpoq qamutitut motorilinnut 900 kg. angullugit oqimaassuseqartunut akileraarut 6.554 koruuninut qaffanneqassasoq. Qamutitut motorilinnut 901 kg.-miit 1.500 kg. angullugit oqimaassuseqartunut akileraarut 10.049 koruuninut qaffanneqassasoq siunnersuutigineqarpoq. Qamutitut motorilinnut 1.501 kg.-miit 1.800 kg angullugit oqimaassuseqartunut oqimaassutsinut immikkoortoq nutaaq siunnersuutigineqarpoq, ukiumut 14.235 koruuninik akileraaruserneqartartunngorlugit. Qamutit motorillit 1.800 kg. sinnerlugit oqimaassuseqartunut akileraarut 16.425 koruuninut qaffanneqassasoq siunnersuutigineqarpoq.

Siunnersuutigineqarpoq motorcykelinut ukiumoortumik akileraarut 3.540 koruuninut qaffanneqassasoq.

§ 2-mut

Siunnersuutigineqarpoq Inatsisartut inatsisaat 1. januar 2011-mi atuutilissasoq, taamaattorli akileraarummik qaffaanerit aatsaat 1. april 2011-miit sunniuteqalissallutik.